



N°665  
Entrée le 29.04.2024  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 29.04.2024

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 26/04/2024

Här President,

**Sou wéi den Artikel 80 vun eisem Chambersreglement et virgesäit, biede mir lech, dës parlamentaresch Fro un d'Ministesches fir Gesondheet weiderzeleeden.**

Den 3ten Oktober 2022 gouf et an der Chamber eng ëffentlech Sëtzung zu der Petitioun n° 2232 "Augmenter la capacité du service existant d'oncologie pédiatrique au Luxembourg", nodeems dës de néidege Seuil vun Ënnerschrëfte kritt huet. Am Kader vun dëser Sëtzung gouf festgehalen, dass d'Servicer an d'Personal vum Service Oncologie Pédiatrique an der Kannerklinik vum CHL sollen ausgebaut ginn.

An deem Zesammenhang wëllte mir der Ministesches dës Froe stellen:

1. Goufen déi zousätzlech Dokterer, bei denen deemols ee Mangel festgestallt gi war, antëscht agestallt? Wat ass bis elo beim Ausbau vu sonstegem medezinesche Personal geschitt? Respektiv wat ass den aktuelle Stand an wat ass nach an der Ëmsetzung oder an der Planung?
2. Wat ass bis elo am Ausbau vun der Unzuel vun de Better geschitt respektiv wat ass Stand aktuell nach an der Ëmsetzung oder an der Planung?
3. Ka méttlerweil och eng Bestralung hei zu Lëtzebuerg ugebuede ginn oder mussen sech d'Kanner a d'Jugendlecher an hir Elteren dofir nach ëmmer an d'Ausland deplacéieren?
4. An der Sëtzung huet d'Ministesches gesot, dass extern Auditte mat dem Institut Gustave Roussy vu Paräis an dem Institut Jules Bordet vu Bréissel ugefrot gi sinn. Goufen dës zwee Auditte scho gemaach?
  - Wa jo, wat ass d'Resultat vun dësen Auditte?
  - Wa nee, wéini sollen dës gemaach ginn?

Mat déiwem Respekt,



[www.piraten.lu](http://www.piraten.lu)

---



CLEMENT Sven  
Deputéierten



GOERGEN Marc  
Deputéierten





LE GOUVERNEMENT  
DU GRAND-DUCHÉ DE LUXEMBOURG  
Ministère de la Santé  
et de la Sécurité sociale

**Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 665 vum 26. Abrëll 2024 vun den honorabelen Deputéierten Här Marc Goergen an Här Sven Clement.**

1. Goufen déi zousätzlech Dokteren, bei denen deemols ee Mangel festgestallt gi war, antëscht agestallt? Wat ass bis elo beim Ausbau vu sonstegem medezinesche Personal geschitt? Respektiv wat ass den aktuelle Stand an wat ass nach an der Ëmsetzung oder an der Planung?

Wéi an der QP 7923 vum 24. Abrëll 2023 beschriwwen, sinn am Beräich Oncopediatrie zwee Peditren am CHL agestallt an et gëtt aktuell kee weidere Besoin. D'Organisatioun vum Behandlungsparours pro Pathologie ass adaptéiert ginn an d'Pflegepersonal ass deementspreechend ugepasst ginn.

Et kënnen awer zu Lëtzebuerg net all Pathologie vun Kriibse bei de Kanner à charge geholl ginn well déi néideg 'masse critique' vu Fäll net ëmmer besteet. Dëst gouf och an der Analyse d'activité am Kader vum Audit vun den Experten bestätegt.

2. Wat ass bis elo am Ausbau vun der Unzuel vun de Better geschitt respektiv wat ass Stand aktuell nach an der Ëmsetzung oder an der Planung?

Den Ausbau vum Service national d'onco-hématologie pédiatrique (SNOHP) ass fir Enn 2026 geplangt mat der Kreatioun vu 4 neien Dagesbetter, souwéi och 4 neien Akutbetter am Kader vun engem Erweiterungsprojet vun der Kannerklinik.

3. Ka mëttlerweil och eng Bestralung hei zu Lëtzebuerg ugebuede ginn oder mussen sech d'Kanner a d'Jugendlecher an hir Elteren dofir nach ëmmer an d'Ausland deplacéieren?

Eng kurativ pediatresch Bestralung gëtt am Moment zu Lëtzebuerg net duerchgefouert fir Patienten ënnert 16 Joer well spezifesch Kompetenzen néideg sinn a well ze wéineg pediatresch Patienten zu Lëtzebuerg eng Bestralung brauchen.

Eng palliativ pediatresch Stralenterapie ass fir d'Zukunft ugeduecht.



4. An der Sëtzung huet d'Ministesch gesot, dass extern Auditte mat dem Institut Gustave Roussy vu Paräis an dem Institut Jules Bordet vu Bréissel ugefrot qi sinn. Goufen dës zwee Auditte scho gemaach? Wa jo, wat ass d'Resultat vun dësen Auditte? Wa nee, wéini sollen dës gemaach ginn?

Den Expert vum Institut Gustave Roussy (Paräis, Frankräich) begleet vun engem Member vum Plan cancer huet een Audit am Dezember 2022 duerchgefouert. Den Auditbericht gouf den Interesséierten am Juni 2023 presentéiert. Den Expert ënnerstëtzt de Service momentan weider a senger Entwécklung.

Een Haaptaspekt dobäi ass d'Aarbechtsstrukturéierung vum Service an d'Zesummenaarbecht mat Zentren am Ausland ewéi och mat verschiddene nationale Partner.

Verschidden Aktiounen sinn zënterhier amgaang:

- Intern an extern Aarbechtsgruppen tëschent den Haaptacturen
- Ausschaffe vu Conventiounen mat Zentren aus dem Ausland
- Ënnerstëtzung vum auslänneschen Expert mat regelméisseg Reunionen

Lëtzebuerg, de 7. Juni 2024

D'Ministesch fir Gesondheet  
a sozial Sécherheet

(s.) Martine Deprez